

Polis rampas 395,000 biji pil eramin 5 di Puchong

Kosmo 2/8/12 MS 9.

# Dadah RM7.9 juta dalam rumah kedai

Oleh FARHANA HANIM  
MOHD. MYDIN  
farhana.mydin@kosmo.com.my

**KUALA LUMPUR** - Kesungguhan pasukan Polis Diraja Malaysia mengekang aktiviti pengedaran dadah terbukti apabila pihak berkuasa itu berjaya membuat rampasan sebanyak 395,000 biji pil eramin 5 bernilai RM7.9 juta selepas menyerbu sebuah rumah kedai di Taman Damai Utama, Puchong dekat sini kelmarin.

Bagaimanapun, serbuan pukul 3 petang itu tidak dapat menahan mana-mana suspek sebaliknya hanya dapat merampas dadah yang siap dibungkus di dalam 20 buah kotak.

Difahamkan, kejayaan itu rentetan usaha berterusan polis membanteras kegiatan pengedaran bahan khayal

itu dalam tempoh enam bulan pertama tahun ini di mana pihaknya telah merampas lebih empat juta biji pil eramin 5 termasuk menyerbu makmal haram di Klang yang keseluruhannya bernilai RM80 juta.

Pengarah Jabatan Siasatan Jenayah Narkotik Bukit Aman, Datuk Noor Rashid Ibrahim berkata, dalam serbuan terbaharu itu, pihaknya percaya dadah tersebut diseludup dari luar negara menggunakan laluan laut.

"Kita masih mencari sindiket terlibat dan setakat hari ini (semalam) tiada tangkapan dilakukan," katanya pada sidang akhbar di sini semalam.

Dalam kes berasingan, Noor Rashid menambah, pihaknya menahan seorang lelaki Iran dan merampas 1.15 kilogram (kg) syabu sebaik

suspek berusia 41 tahun itu tiba di Lapangan Terbang Antarabangsa Kuala Lumpur dari Doha pada pukul 4 petang, 26 Julai lalu.

"Dadah itu disembunyikan di dalam ruangan khas beg yang dibawanya. Empat hari kemudian, kita menahan pula seorang wanita Guinea berusia 30 tahun pada pukul 8 malam di tempat yang sama dan merampas lebih 1.5 kg syabu," katanya.

Menurut Noor Rashid, wanita itu ditahan sebaik tiba dari Kaherah dan dadah tersebut pula disembunyikan di dalam begasi dan seluar dalam yang dipakainya.

Kesemua kes itu disiasat mengikut Seksyen 39B Akta Dadah Berbahaya 1952 yang memperuntukkan hukuman mati mandatori jika sabit kesalahan.



NOOR RASHID (dua dari kiri) menunjukkan pil eramin 5 yang dirampas daripada sebuah rumah kedai di Puchong pada sidang akhbar di Bukit Aman semalam.